



GOVERNUN KONSTITUSIONÁL VIII

Rezolusaun Governu nian N. 17 /2021

Loron 15 fulan-marsu

Impoin serka sanitária iha munisípiu Baukau

Konsidera katak, servisu vijilánsia epidemiolójika diagnostika ona kazu COVID-19 nian neen ba ema sira-ne'ebé hela iha munisípiu Baukau;

Konsidera katak, tuir informasaun ne'ebé fó-sai husi servisu tékniku sira husi Ministériu Saúde, kazu COVID-19 nian ne'ebé hetan diagnóstiku provavelmente maihusi situasaun tranzmisaun lokál SARS-CoV-2 nian;

Konsidera ba urjénsia atu adota medida hirak ne'ebé impede tranzmisaun virus SARS-CoV-2 nian husi ema hirak ne'ebé hela iha munisípiu Baukau ba ema sira seluk ne'ebé hela iha munisípiu sira seluk, hodi evita surtu COVID-19 mosu iha fatin seluk iha territóriu nasionál;

Konsidera katak interruptsaun ka kriasaun kondisaun ne'ebé rigoroza ba sirkulasaun iha territóriu nasionál sai nu'udar forma ida mós ne'ebé efikás liu atu prevene disseminasaun COVID-19 nian iha territóriu nasionál;

Konsidera ba nesesidade atu impede ka hamenus númeru husi kontaktu prezensial entre ema sira ne'ebé hela iha Munisípiu Baukau no ema sira seluk ne'ebé hela iha munisípiu sira seluk to'o determina, ho grau serteza nian ne'ebé aas, katak iha munisípiu ne'e la iha tan kazu diagnóstiku pozitivu COVID-19 nian seluk, ne'ebé maihusi situasaun tranzmisaun lokál ka komunitária.

Konsidera katak, tanba situasaun kalamidade pública, ne'ebé provoka husi pandemia COVID-19, Dekretu Prezidente Repúblika nian n. 15/2021, lora 1 fulan-marsu, deklarara ona estadu emerjénsia atu vigora husi tuku 00:00 lora 4 fulan-marsu to'o tuku 23:59 lora 2 fulan-abril tinan 2021.

Konsidera katak alínea b) husi artigu da-4 Dekretu Prezidente Repúblika nian n. 15/2021, lora 1 fulan-marsu, determina ona katak iha suspensaun parsial ba liberdade sirkulasaun no liberdade atu hela iha fatin ne'ebé de'it iha territóriu nasionál, tanba ne'e autoridade pública sira ne'ebé iha kompeténsia bele impoin restrisaun sira ne'ebé presiza atu hamenus risku kontájiu nian no atu ezekuta medida sira prevensaun no luta hasoru epidemia ne'e nian, inklui distansiamentu sosial, kuarentena ba ema ne'ebé deskonfia hetan ona infesaun, izolamentu ba ema moras sira ka ema ne'ebé deskonfia hetan ona moras, obriga ema atu hela iha uma de'it no impozisaun serka sanitária nian sira;

Konsidera katak alínea o) husi n. 1 artigu da-115 Konstituisaun Repúblika nian fó kompeténsia ba Governu atu pratika atu saida de'it no foti medida prevensaun nian sira ne'ebé nesésaria ba dezvoltamentu ekonómiku-sosiál no ba satisfasaun nesésidade komidade timoroan sira nian.

Governu hasai rezolusaun, bazeia ba alínea o) husi n.1 husi artigu da-115 Konstituisaun Repúblika nian no ba alínea b) husi artigu da-4 Dekretu Prezidente Repúblika nian n. 15/2021, lora 1 fulan-marsu, hanesan tuirmai ne'e:

1. Determina serka sanitária nian ida iha munisípiu Baukau, no bandu ema atu halo sirkulasaun entre munisípiu ida-ne'e no sirkunskrisaun administrativa sira seluk, sein prejuízu ba exesaun sira ne'ebé prevee iha número tuirmai ne'e;
2. Primeiru-Ministru bele autoriza, nu'udar exesaun, ema hodi halo sirkulasaun entre munisípiu Baukau no sirkunskrisaun administrativa sira seluk iha kazu sira ne'ebé iha fundamentu forte ho razaun seguransa pública, saúde pública, assistência umanitária, manutensaun ba sistema abastesimentu público ka realizasaun interesse público;
3. Primeiru-Ministru bele delega, ho possibilidade atu halo subdelegasaun, ba Diretór Sentru Integradu Jestaun Krize nian, kompeténsia ne'ebé prevee iha número anteriór.
4. Pedidu sirkulasaun nian entre munisípiu Baukau no sirkunskrisaun administrativa sira seluk, interesadu sira mak haruka ba Diretór Sentru Integradu Jestaun Krize nian, di'ak liu haruka liuhusi enderesu korreiu eletróniku (e-mail) centrointegradogestaodecrises@gmail.com, maibé ida-ne'e la taka dalan atu interesadu sira bele entrega diretamente pedidu ne'e iha instalasaun Autoridade Munisipál Baukau nian, ne'ebé sei haruka tutan pedidu hirak ne'e ba enderesu korreiu eletróniku (e-mail) ne'ebé temi ona iha leten;
5. Autorizasaun ba sirkulasaun entre munisípiu Baukau no sirkunskrisaun administrativa sira seluk ne'ebé atu konsede, nu'udar exesaun, sei fó, uza formatu eskritu, iha ne'ebé identifika ema ne'ebé hetan autorizasaun atu sai husi ka tama iha área munisípiu Baukau nian, ho identifikaun xapa matrícula husi veíkulu ne'ebé sei uza hodi halo dezlokasaun, lora no motivu dezlokasaun nian no informasaun kona-ba maihusi ne'ebé no atu ba ne'ebé;
6. Ema sira ne'ebé, tuir saida maka hateten iha número liubá ne'e, hetan autorizasaun atu halo sirkulasaun liuhusi área munisípiu Baukau nian, tenke sirkula liuhusi estrada nasionál ne'ebé liga Lospalos ho Dili, ho veíkulu tuituir malu iha liña, ho akompañamentu husi Polísia Nasionál Timor-Leste
7. Iha limite orientál no osidentál Baukau nian, iha estrada hirak ne'ebé temi iha número liubá ne'e, sei harii Sentru Kontrolu Integradu sira ne'ebé funsiona:
 - a) Iha lora-segunda, lora-kuarta no lora-sesta, husi tuku 06:00 dadeer to'o tuku 16:00;
 - b) Ho ekipa sira ne'ebé komposta husi funsionáriu, ajente ka traballadór administrasaun pública nian ne'ebé nomeia husi Ministru Interiór, Ministra Saúde, Ministru Administrasaun Estatál no Ministru Agrikultura no Peskas, ne'ebé sei informa ba Diretór Sentru Integradu Jestaun Krize nian kona-ba sira-nia identidade no kontaktu sira;

- c) Ho koordenasaun husi Komandante Operasionál Sala Situasaun Sentru Integradu Jestaun Krize nian, ne'ebé bele delega kompeténsia ne'e ba Komandante Operasionál da-2.
8. Aleinde kumpre regra sira ne'ebé hatuur ona iha número 6 no 7, sirkulasaun sasán entre munisípiu Baukau no sirkunskrisaun administrativa sira seluk, liuhusi rai-maran, tenke halo tuir mós regra sira tuirmai ne'e:
- a) Kondutór no tripulasaun veíkulu nian sira seluk ne'ebé tula sasán lori ba munisípiu Baukau, no ne'ebé mai husi sirkunskrisaun administrativa sira seluk, sei para de'it iha sentru kontrolu integradu sira, no husi ne'ebá, kondutór ka tripulasaun seluk maka sei tula fali sasán hirak ne'e tama ba munisípiu Baukau laran;
 - b) Kondutór no tripulasaun veíkulu nian sira seluk ne'ebé tula sasán ba sirkunskrisaun administrativa sira seluk, no ne'ebé maihusi munisípiu Baukau, sei para de'it iha sentru kontrolu integradu, no husi ne'ebá, kondutór ka tripulasaun seluk maka sei tula fali sasán hirak ne'e ba fatin sira fora husi munisípiu Baukau;
 - c) Molok troka kondutór no tripulasaun sira, ne'ebé alínea anteriór sira ne'e temi ona, ekipa sentru kontrolu integradu sei dezinfeta parte ne'ebé maka kondutór no ajudante sira hela baibain iha laran husi kabine veíkulu terrestre nian ne'ebé tula sasán, tuir norma sira ne'ebé sei hetan aprovasaun husi diploma ministeriál Ministra Saúde nian.
9. Bainhira sirkulasaun sasán nian uza transporte marítimu ka aéreu, tripulasaun transporte sira-ne'e nian labele tuun husi embarkasaun ka aviaun ne'e;
10. Bainhira de'it karik bele, sasán ne'ebé la aat lalais, no ne'ebé sirkula entre Baukau no sirkunskrisaun administrativa sira seluk, kumpre período armazenamentu nian ida iha fatin ne'ebé halo tuir regra ijienizasaun nian ne'ebé sei aprova husi diploma ministeriál Ministra Saúde nian, molok distribui liuhusi komérsiu retallu nian;
11. Rezolusaun Governu nian ida-ne'e sei kaduka iha tuku 23:59 loron 29 fulan-marsu tinan 2021;
12. Rezolusaun Governu nian ida-ne'e tama iha vigór iha loron tuirmai husi ninia loron publikasaun nian.

Aprova iha Konsellu Ministrus, iha loron 15 fulan-marsu tinan 2021.

Publika kedas.

Primeiru-Ministru,

Taur Matan Ruak